



**Komunikadu Imprensa**  
**Tribunál Judisiál Primeira Instáncia Dili**  
**12 Marsu 2025**

**Julgamentu Movél iha Munisípiu Ermera maioria julga kazu sira ho  
natureza violénsia bazeia ba jéneru**

Iha 24 to'o 28 Feveireiru 2025, Tribunál Judisiál Primeira Instáncia Dili, realiza julgamentu movel iha Edifísiu Delegasaun Prokuradoria Ermera, Munisípiu Ermera ho maioria kazu ne'ebé julga mak kazu sira ho natureza Violénsia Bazeia ba Jéneru (VBJ).

“JSMP apresia ho Tribunál Judisiál Primeira Instáncia Dili ne'ebé kontinua fó prioridade aas ba iha kazu sira ho natureza violénsia bazeia ba jéneru iha Programa Tribunál Movel. Programa ida ne'e, alende nu'udar meu ida hodi hamenus kazu sira pendente, iha tempu hanesan mós hakbesik liután justisa ba comunidade sira,” dehan Sra. Ana Paula Marçal, Diretora Ezekutiva JSMP.

Kazu sira no natureza violénsia bazeia ba jéneru (VBJ) ne'ebé julga iha tribunál movel ne'e konstitui krime ofensa ba integridade fizika simples ho natureza violénsia doméstika (VD) hamutuk hitu (7), ofensa ba integridade fizika simples ho natureza VD no arma brankas (1), maus-tratus ba kónjuje ida (1), koasaun seksuál rua (2), abuzu seksuál ba menór ida (1) no abuzu seksuál ba ema ne'ebé labele reziste ida (1). Hamutuk kazu 12 hosi kazu 30 ne'ebé tribunál julga iha tribunál movel ne'e.

Enkuantu kazu sira seluk envolve krime sira hanesan ofensa ba integridade fizika simples, ameasa, danu simples, furtu simples no mós kondusaun sein karta no kazu kontinuasaun sira seluk.

Hosi kazu ne'ebé mak JSMP monitoriza iha kazu lima (5) mak hetan ona desizaun. Kazu hirak ne'e mak hanesan; ofensa ba integridade fizika simples ho natureza violénsia doméstika haat (4), ne'ebé kazu tolu (3) kondena ho pena multa, no kazu ida (1) kondena ho pena prizaun tinan ida (1) suspende ba tinan ida (1). Kazu abuzu seksuál ba menór ida (1), tribunál kondena arguidu ho pena prizaun tinan ida (1) suspende ba fulan neen (6) no selu indemnizasaun sivil ba ofendida US\$250.00.

Enkuantu kazu neen (6) seluk, sei kontinua prosesu hodi rona leitura sentensa mak hanesan ofensa ba integridade fizika simples-VD tolu (3), ofensa ba integridade fizika simples-VD no arma brankas ida (1), maus-tratus ba kónjuje ida (1) no koasaun seksuál ida (1).

Iha parte seluk, kazu rua (2) ne'ebé envolve krime kazu koasaun seksuál no abuzu seksuál ba ema ne'ebé labele reziste, tribunál adia prosesu julgamentu

ba fali loron seluk tanba arguidu ba kazu koasaun seksuál nu'udar ema ho defisiénsia mentál no ofendida ba kazu abuzu seksuál ba ema ne'ebé la bele reziste iha difikuldade atu ko'alia no kumpriende pergunta sira hosi juis no prokuradór sira, nune'e la permite atu kontinua prosesu julgamentu.

Durante julgamentu ba kazu abuzu seksuál ba ema ne'ebé la bele reziste JSMP rejista katak alende ofendida la bele kapta autór judisiáriu sira ninia pergunta ho lais no la bele ko'alia ho di'ak, JSMP mós observa katak ofendida mós sente ladun seguru no iha sentimentu moe.

Julgamentu movel ne'e prezide hosi juis kolektivu, Dra. Zulmira da Silva, Dr. Ivan J. S. P. Antonino no Dr. Argentino Luisa Nunes. Prokuradór representa hosi Dr. Ricardo Leite Godinho, no arguidu sira representa hosi Dr. Humberto Alves hosi Defensória Pública.

Atu hetan informasaun kompletu favor kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)